

Dithero tsa Tirelano mo Kutlwanong

38/2015 Thero ka Sontaga wa 6 morago ga moletlo wa Borarobongwe, e le ka 28. 06. 2015

Mo leineng la Modimo o e leng Rara le Morwa le Mowa o o Boitshepo_

Lefoko le le okamelang beke eno, le kwadilwe mo go Jes. 43:1, le re: **"Se boife, gone ke go golotse, ke go biditse ka leina la gago! O wa me.**

1. Sefela sa 371 - 343/350

2. Thapelo: Modimo Rara yo o mo legodimong, re a go leboga, ka o galaeditse Morwa Motho, e bong Morwa Maria, ka go mo naya thata yotlhe mo legodimong le mo lefatsheng. Morena Jesu Keresete, re a go leboga, ka o solofeditse go nna le badumedi ba gago go ya mo bokhutlong jwa lefatshe, le go naya barutwa ba gago tiro go dira merafe yotlhe go nna barutwa ba gago ka go ba kolobetsa mo leineng la Rara le Morwa le Mowa o o Boitshepo, le ka go ba ruta go boloka tse o di ba laetseng. O re thuse gore re itumelele tiro eo, re e dire re bolokegile, le go femelwa ka tsholofetso le thata ya gago. O re utlwe ka ntlha ya lorato lo logolo lwa gago. Amen.

3. Lefoko la Testamente e kgologolo le kwadilwe mo go Jes. 43:1-7;

Epistolo ka fa thulaganyong ya 2 e kwadilwe mo go Baroma 6:3-11;

Lefoko ka fa thulaganyong ya 3 le kwadilwe mo go Doiteronomia 7:6-12.

4. A go ipolelwe tumelo ya bokeresete!

5. Sefela sa 369 - 341/348

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Matheo 28:16-20, e re: "Barutwa ba ba 11 ba ya kwa Galelea kwa thabeng e Jesu o e ba kaetseng. Ya re ba mmona, ba mo obamela; mme ba bangwe ba belaela. Jesu a tla kwa go bone, a bua nabo a re: Thata yotlhe ke e neilwe kwa legodimong le mo lefatsheng. Ka moo he, yaang lo dire merafe yotlhe barutwa, lo ba kolobetse mo leineng la Rara le la Morwa le la Mowa o o Boitshepo, lo ba rute go tlhokomela tsotlhe tse ke di lo laetseng. Mme itseng, nna ke na le lona ka malatsi otlhe go ya bokhutlong jwa lefatshe." Amen.

8. Thero: Phuthego e e rategang ya Morena wa rona Jesu Keresete, ga se sebaka, fa Efangele eno e re tswang go e utlwa e beilwe go nna Efangele ya Sontaga wa 6 morago ga moletlo wa Borarobongwe. Ka dinyaga dingwe e ne e le Lefoko la thero ka moletlo wa Tlhatlogo le ka wa Borarobongwe, mme jaanong ke ya Sontaga wa kajeno o o neng o laotswe ka thuto ya Epistole ka metlha gore re gopole kolobetso ya rona, fa e kaya gore "Atame yo mogologolo yo o mo teng ga rona a nwediwe ka boikwatlhao le tlabologo ka malatsi otlhe gore a swe, maleo otlhe le dikeletso tsotlhe tse di bosula di swe nae; mme jaanong go tswe go be go tsoge motho yo mošwa ka gale, yo o tshelang fa pele ga Modimo, a le mo tshiamong le mo boitshekong ka bosenabokhutlo," jaaka Kereke ya Lutere e ipolela ka fa mafokong a Epistole ya kajeno. Ke a amogela gore ke ka ntlha ya moo, fa barulaganyi ba bašwa ba dipuiso tsa Lefoko la Modimo ba kgethile taolo ya Morena Jesu go dira merafe yotlhe barutwa ka go ba kolobetsa mo leineng la Rara le Morwa le Mowa o o Boitshepo go nna Efangele ya Sontaga wa kajeno.

Ka go dira jalo ba ne ba ikaelela se segolo. Ba batla gore re gopodiwe ka ngwaga le ngwaga, fa rona ba re kolobeditsweng re dirilwe go nna barutwa ba ga Jesu, gongwe bana ba Modimo. Go a batlega gore re gopole boammaaruri joo, re se belaele gope, fa go kolobediwa ka metsi mo leineng la Modimo o e leng Rara le Morwa le Mowa o o Boitshepo go dira tiro e kgolo eo. Go batlega jalo, gonne go na le ba le bantsi kajeno ba ba timeditsweng ke batimetsi gore ba se ka ba tlhola ba dumela boammaaruri joo, ba belaele ka kokobetso e re kolobeditsweng ka yona, fa re ne re sa ntse re le masea. Re gopola se Kereke ya Lutere e se ipolelang mo Kategisimeng e nnye ka tlhomamo e e theilweng mo Lefokong la Modimo ka go araba potso e e reng: Metsi a ka dira jang dilo tse dikgolo tseo? Ka gore "ga se metsi a a di dirang, mme ke Lefoko la Modimo le le mo metsing le tumelo e re ikanyang Lefoko leo la Modimo mo metsing ka yona; gonne fa Lefoko la Modimo le se yo mo go ona, e ntse e le metsi fela, mme e seng kolobetso. Mme fa Lefoko la Modimo le le mo metsing, metsi ao ke kolobetso, ke gore ke metsi a botshelo a a nang le pholoso, le gona ke tlhapiso ya go tsalwa sešwa ka Mowa o o Boitshepo." Motho yo o kolobeditsweng ka metsi mo leineng la Modimo o o Borarobongwe o kolobeditse, le fa e le ka go nwediwa mo metsing, gongwe ka go tshelwa metsi fela, le fa e le bagolo, gongwe masea. Kolobetso ya gagwe e tlhomame. A a amogele se a se diretsweng mo go yona ka tumelo, a dumele gore ka kolobetso o itshwaretswe maleo, le go gololwa mo losong le mo thateng ya ga Satane, le go newa phologo ya bosakhutleng. Ke fa e le ngwana wa Modimo le moruaboswa jwa botshelo jo bo sa khutleng.

Mme Efangele ya kajeno ga e bue fela ka kolobetso, e akaretse tiro e kgolo e barutwa ba ga

Jesu, mmogo le kereke ya bokeresete ba bileditsweng mo go yona. Ke raya tiro ya thomo. A go se nne ope mo gare ga rona yo o gopolang gore tiro eo ke ya nako e e fetileng. Le baruti ba e leng barongwa ba se ka ba gopola gore tiro eo e dirilwe. Ee, e dirilwe mo sebakeng se se fetileng ka tlhoafalo e kgolo, mme tiro eo e tshwanetse go dirwa go ya batho botlhe ba merafe yotlhe ba kolobediwa, le go rutiwa go boloka tsotlhe tse Jesu a di laetseng barutwa ba gagwe. Ka moo ke tshwanelo gore re kaelwe ka ngwaga le ngwaga, ka metlha gore Efangele ya kajeno e re bolelelang gore tiro ya thomo e tshwanetse go dirwa jang. A e dirwe

1. ka go ikanya thata le tshofetso ya Morena Jesu Keresete;

2. ka go kolobetsa le ka go ruta.

1. Tiro ya thomo e dirwe **ka go ikanya thata le tsholofetso ya Morena Jesu Keresete.**

Jesu yo o kileng a bapolelwa mo sefapaanong, le go tsoga mo baswing ka letsatsi la boraro, o a itshupa, a re: "Thata yotlhe ke e neilwe kwa Legodimong le mo lefatsheng." O a solofetsa, a re: "'Mme itseng, nna ke na le lona ka malatsi otlhe go ya bokhutlong ya lefatshe." Ke ene yo o batlang gore merafe yotlhe e dirwe barutwa. Se se fetang thata yo rona, se diragala ka go ikanya thata le tsholofetso ya ga Keresete. O solofeditse gore le fa peo ya Lefoko le wela mo tseleng, le mo majweng, le fa gare ga mebitlwa, peo e nngwe e tla wela mo mmung o o tla ungwang ga masome a le mararo, ga masome a maratara, gongwe ga lekgolo, gonne Morena Jesu o teng ka Mowa wa gagwe gore o bitse batho ka Efangele, le go ba sedimosetsa ka dineo tsa ona, le go ba itshepisa, le go ba boloka mo tumelong e e siameng. Ka go ikanya jalo go a bonala gore tiro ya thomo e tla unywa maungo a mantle le mo nakong ya kajeno.

2. A re se ka ra leka go e dira ka fa dikakanyong tsa rona gongwe ka tsa batlhalefi ba batho, re dire tiro ya thoma **ka go kolobetsa mo leineng la Modimo o e leng Rara, le Morwa, le Mowa o o Boitshepo, le ka go ruta batho go tlhokomela le go boloka tsotlhe tse Jesu a di laetseng barutwa ba gagwe.** Ba ba iseng ba kolobediwe ba bilediwe mo kolobetsong, ba ba sa tiholeng ba dumela ba busediwe mo kolobetsong. Mo kolobestong ya bokeresete go a bonala gore motho ga a kgone go ikgolola mo maleong a gagwe, mme o tshwanetse go pholosiwa ka go tlhapiwa ka metsi a kolobetso gore a tsalwe sešwa, a ntšhwafadiwe ke Mowa o o Boitshepo. Yo o neng a kolobediwa e le lese a o tshwanetse go rutiwa morago gore a se ka a latlhegelwa ke neo ya kolobetso, mme a bolokelwe mo tumelong ka go rutiwa tsotlhe tse Jesu a di laetseng barutwa ba gagwe, lesedi la tumelo le le tshubilweng mo kolobetsong le tuke, le se time, le nne le lookwane ka metlha.

A botlhe ba ba tlhoafalelang tiro eo ya go biletsa batho, le go busetsa ba ba setseng ba kolobeditse mo kolobetsong, ba se ka ba belaela ka tiro ya bone, ba gopole gore matsapa a bone ga se a lefela mo Moreneng. Jesu yo o neilweng thata yotlhe o teng. O solofeditse gore o tla nna le ba ba dirang tiro eo ka metlha. Efangele ya gagwe "e tla rerwa mo lefatsheng lotlhe go nna tshupo mo merafeng yotlhe; ke gona bokhutlo bo tla tlang." Mo bokhutlong jwa lefatshe tiro e tla khutla, mme ka lefatshe le ise le khutle, tiro ya thomo ga e nke e khutla. E tshwanetse go dirwa, bogolo fa re utlwa ka dipalo tsa batho mo merafeng, fa e le ba ba masome a a supang le go feta mo lekgolong ba ba sa itshupeng gore ke bakesetse, fa batho ba balwa. Beibele, gongwe dikarolo dingwe tsa yona di fetoletswe mo dipuong tse di 6000, mme mo dipuong tse dingwe batho ga ba ise ba kgone go buisa Lefoko la Modimo ka puo ya ga gabo. Ga twe: go na le dipuo tse di fetang 20000. Tiro e sa ntse e le teng, Tiro e ntsi. Dikereke tsa mafatshe otlhe a di tsoselediwe go tlhoafalela go dira tiro ya thomo, mo gare ga gabo, le mo bathong ba merafe e mengwe. Morena o solofedise gore Lefoko la ona le tla ungwa maungo a tumelo, a tlabologo, a lorato, a tsholofelo. Tiro ya ona ga e direlwe lefela! Amen.

9. Thapelo: Modimo, Mong-wa-thata-tsotlhe, o o se nang tshimologo, le e seng bokhutlo, wena yo o itshepisang kereke yotlhe ya bokesetse ka Mowa o o Boitshepo ka go ba gogela mo tumelang, le go ba bolokela mo go yona, wa e busa ka ona, wa e aga ka kolobetso le thuto, a o ko o utlwe thapelo ya rona, o re fe ka bopelotlhomogi jwa gago gore ditokololo tsotlhe tsa phuthago ya gago di go direle ka tumelo e e itshekileng, ka boitshepo jwa nnete, o tlhoafalele tiro ya lorato lwa go senka le go batla ba ba timetseng, ba ba latlhegileng, ka tshiamo e e go natefelang ka ntlha ya bopelotlhomogi jwa gago jo bo mo go Keresete Jesu, Morwao, Morena Morepholosi. Amen

Thapelo ya Morena: Rara wa rona yo o mo legodimong ...

10. Sefela sa 255 - 237/247

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber , ka ngwaga wa 2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.